



# QUÆSTIO MEDICA

QUODLIBETARIIS DISPUTATIONIBUS

MANE DISCUTIENDA

IN SCHOLIS MEDICORVM

Dic Jovis 20. Novembris.

M. PETRO YVELIN,

DOCTORE MEDICO, PRÆSIDE.

*An ut semen materia fœtus, sic & ejusdem opifex?*

I.

CUM aternâ nullâque arte declinandâ lege sancitum sit mortem ut oppetant quæcumque nascuntur animantes, earum genus omne deleretur, nisi sâtu se se propagarent, similiisque procreatione aternitatis quodammodo participes fierent. Inter illas plurimæ certis ex causis, quæ vulgaria latent ingenia, sponte, & sine ullo, saltem manifesto, seminis jactu suboriuntur, cujusmodi sunt vermes, erucæ, apes, vespæ, scarabari, crabrones, & quotquot solent αῖνόματα appellari, quorum neque tanta vilitas est, ut putri è materia originem ducant, neque tanta nobilitas, ut sit aliquis Deus, à quo fingan-

tur cœlo devocandus : caloris , qualis verè est , temperato quodam foru ac tepore gignuntur propriis è seminibus , vel passim suis apertè coëuntibus principiis extra hæc animalcula coagmantur , vel ab ipso mundi exordio in aëre , aquâ , terræ sparsa temporum serie evolvuntur ac prodeunt , vel demùm fiunt ex ovis à suæ speciei viventibus ubivis relictis , quod perspicuum in bombycibus , minùs in cæteris , quorum nec utilitas ulla est , nec tam facile capitur experimentum : Casui minùs patet generatio oviparorum & viviparorum , quæ necessariò à sui simillimis , conspicui seminis interventu , procreantur.

## I I.

**P**ERFECTIORA animalia ut primùm adolevère , gignunt , habentque semen in suis reconditum loculis , absumpto scilicet prægressæ ætatis humore superfluo robur colligunt partes , plusque ultimi assumunt alimenti quàm opus sit ut alantur & augeantur : Propterea inde quædam particulæ maturorum fructuum instar decidunt , cùmque per meatus vi calor dilatatos unâ confluunt , partem efficiunt alteram seminis è spiritu & humore conflati . Is porrò humor πανσπερμία quædam est , seu commemoratarum particularum ( quæ germana sunt partium omnium semina ac rudimenta ) confusa congeries . Spiritus autem , seminis pars altera , apud Chemicos est Archeus , apud Medicos viventis formator & opifex , fortè que apud Aristotelem forma substantialis . Qualecunque nomen ipsi imponatur , non est materiæ expers substantia , non stellaris essentia scintilla , non avulsa pars ætheris , non focarius ignis , non Dei particula , non ab illâ totius mundi animâ direpta portio ; sed prætenue corpus ex subtilissimis planèque mobilibus corpusculis ingeniosè concinnatum .

## I I I.

**S**EMEN nec cerebri stilla est , nec spinalis medullæ defluvium , nec universi corporis excrementum , nec quippiam à tribus duntaxat principibus partibus , sed ab omnibus singulisque profectum . Cave tamen putes illud in plenâ jucundæ voluptatis conjunctione per cœcos ductus citissimè genitalles ad partes currere . Ille enim humor qui seminis materia est , nullo definito tempore per minimas venas in majores delapsus , ab iisque per cavæ truncum in cor unâ cum sanguine eò se referente deportatus ; tùm per descendentem aortam , arteriasque

3  
 spermaticas deductus ad testes, ac per eos non secus atque ferum per renes, cretus, à sanguine cui erat admixtus sejungitur, ac demum in propria conceptacula, his qui cadavera aperuere explorata, amandatur: Pernix autem, tenuis admodumque mobilis spiritus in humorem ipsum per tacitas vias momento se induit, atque is quoties succensus effervescit, confestim surgit illa, quæ ferè rationis jugum excutit, coeundi libido furiosa.

## I V.

**S**PIRITUS tunc potissimum in humorem incurrit, cum sexus discreti, in illo solemni officio quod marem ac fœminam miscet, mutuò sibi blandiuntur molliùsque se se attrahant, istis quippe illecebris, quibus majori proluditur, is vehementer concitatus impetu fertur in pudendas partes, quas inflat distenditque libidine. Ita amoris cestro perciti amantes ruunt in amplexus venereos, quos inter, partibus omnibus contentibus, spiritus sui portionem exprimunt, eamque semini inclusam tanto interdum delectationis sensu ejiciunt, ut tùm aliquid etiam de animâ exiisse sibi persuadeant; adeo in hoc ipso ultimæ voluptatis æstu marcescunt & devigescunt, nec sine quodam lucis detrimento. Et certè nisi huc penè amentes raperet præterita oblectationis recordatio, aut nunquam, aut rariùs daretur proli opera: Masné verò, cujus calor uberior, acriorem sub Veneris vexillis catullitionem persentiat, an emissio admissoque semine magis oblectetur fœmina, non facile pronuntiaveris.

## V.

**Q**UEMADMODUM peractâ re venerâ, jacta hinc inde in uterum semina permiscuntur & in unum coalescunt, sic ex amborum spiritibus unus fit spiritus, mox quidquid est subtiliorum partium ad intima se se recipit, suisque coagitationibus crassiores ac veluti superfluentes elidit, & versùs molis universæ superficiem abigit: Hæ verò, quia pariles sunt & quodam necessitudinis vinculo coherent, abeunt in membranas genituram obvoluturas. Interea inclusæ confusæque reliquæ humoris particule, ob ingenuos quos obtinent motus, ita se se expediunt, ut quæ ejusdem modi sunt societatem coeant, eumque sibi vendicent locum ac situm quem tenebant partes à quibus decissæ sunt. Ita quæ à capite prodire,

conveniunt ad coagmentandum caput, quæ à pectore ad pectus, quæ à renibus ad renes, quæ ab artubus ad efformandos artus commigrant: Et rursus ex iis quæ ad caput pertinent (sit illud instar omnium) sigillatim aliquæ concurrunt ad effingendas particulas iis consimiles à quibus decerpæ sunt; ad oculum scilicet, quæ ab oculo; ad nares, quæ è naribus excidère, &c. Istarum autem partium descriptionem, formationem, ordinemque aggreditur, promovet, & absolvit solus spiritus cohibitus in semine omnium perfectorum animantium præterquam hominis, cujus admirabilis fabricatio tantæ dignitatis est & excellentiæ, ut illa non nisi animâ duce perfici queat. Neque tamen putes spiritum illum aliquâ cognitione ductum opus suum elaborare; quoniam ex iisdem est principiis ejusdemque naturæ cum spiritu è quo defluxit, ad easdem aspirat motiones, quarum obeundarum necessitas efficit, ut nihil non certâ ratione digerat, & compingat. Partibus tandem hoc modo expressis, subtiliores spiritus extricati & corde accepti moventur expeditissimè: Crederes peculiarem sui que generis ignem luce defectum, qui ut primum accenditur, vita incipit, simul atque exstinguitur, desinit.

*Ergo ut semen materia fœtus, sic & ejusdem opifex.*

## DOMINI DOCTORES DISPUTATURI.

*M. Fabianus Perreau. M. Ludovicus Gallais.*

*M. Paulus Courtois,  
Professor Regius.*

*M. Edmondus Charrier. M. Franciscus Gouel, Schola Professor.*

*M. Guillelmus Petit.  
M. Rolandus Merlet.*

Proponebat Lutetiæ GUILLELMUS LAMY,  
Constantienfis, A. R. S. H. MDCLXX.

---

P A R I S I I S,

Ex Typographiâ FRANCISCI MUGUET, Regis &  
Illustrissimi Archiepiscopi Typographi,  
viâ Citharæ.